



Aalisartunut qaleralinnik paggatassiilluni aalisarsinnaanermik akuersissuteqartunut angallatip annerpaaffissaanik piunasaqaat 9 miiterimut qaffanneqassappat, aalisartunut inuiaqatigiinnullu sunniutissai pillugit Naalackersuisut misissueqqullugit peqquneqarnissaannik inatsisartut aalajangiiffigisassaattut siunnersuut. Misissuinermit inernerit kingusinnerpaamik UPA2023-imi inatsisartunut agguanneqassapput.

(Siumup Inatsisartunut ilaasortaataitai)

(Siullermeerneqarnera)

Nassuerutigisariaqarpara, una siunnersuut Naalackersuisuniillu akissutigineqartoq tupigusuutigilaarakkit.

Siunnersuut qaleralinnik paggatassiilluni aalisarnermut tunngavoq. Siumut aamma Naalackersuisut isumaqarput, aningaasanik atuissasugut misissueqqissaarnermut, aalisartunut inuiaqatigiinnullu kingunissai pillugit qaleralinnik paggatassiilluni aalisarsinnaanermut akuersissuteqartunut angallatip annerpaaffissaanik piunasaqaat 9 miiterimut qaffanneranni.

Tassunga tunngatillugu allatut ajornartumik innersuuttariaqarpara, suliarujussuaq maannakkut Aalisarnermut Ataatsimiititaliarisuuq suliarisaa. Tassanngaanniimmi innersuussut ersarilluinnartoq unaamat paggatassiilluni aalisarneq atorunnaassasoq ataasiakkaarlunilu tunisinnaasanik pisassiissutinik taarserneqassasoq. Tamanna tunngavigalugu asuli aningaasartuuteqarnertut isikkoqarpoq aalisarnerup taamaattup kingunissaanik misissueqqissaarnissaq, ilimagisat malillugit atunngittoortussamik.

Naalackersuisut ilumut isumaqarpat, akileraartartut aningaasaataat misissueqqissaarnermut atussagigit, qaquguluunniit atorneqartussaangitsutut isikkulimmut?

Imaluunniit Naalackersuisut saqqumiutinngisaminnik isumaqarnerpat, Aalisarnermut Ataatsimiititaliarisuuq innersuussutai tusaarusunnagit?

Taassuma akissuteqarfiginissaa assorsuaq soqutiginarpoq.

Imaassinnaangilaq, akileraartartut aningaasaataat sunulluunniit atorsinnaagigit.

Eqqarsarluartariaqarpugut aningaasat misissueqqissaarnernut nalunaarusianullu atornissaannik aalajangiinginnitsinni. Eqqaamassavarput, aningaasat ataasiaannarlutik atorneqarsinnaammata.

Tamanna tunngavigalugu siunnersuutip itigartinneqarnissaa innersuussutigaarput.